

**Siunnersuut uunga: Naalakkersuisut aatsitassanut inatsisip allannguutissaanik, annikitsuinnarmik misissuinissamat aamma piiaanissamat akuersissut inunnut Kalaallit Nunaanni najugaqavissunut tamakkiisumillu akileraartussaataitaasunut aammalu Kalaallit Nunaanni ukiuni qulini inuit allattorsimaffianni nalunaarsorsimallutik najugaqareersimasunut aamma Kalaallit Nunaanni ukiuni qulini tamakkiisumik akileraartussaataareersimasunut taamaallaat tunniunneqarsinnaasunngorlugu, UKA 2016-imut saqqummiinissamat Naalakkersuisut peqquneqarnissaannik Inatsisartunut aalajangiiffigisassatut siunnersuut**

(Inatsisartunut ilaasortaq Anthon Frederiksen, Partii Naleraq)

### **Akissuteqaat**

(Aningaasaqarnermut Aatsitassanullu Naalakkersuisoq)

### **Siullermeerinnineq**

Annikitsumik aatsitassarsiornerup oqaluserineqarnissaanut periarfissamat matumunnga Naalakkersuisut qujapput. Annikitsumik aatsitassarsiorinissamat akuersissutit aatsitassanut suliassaqarfimmi pingaaruteqartutut ilaapput, tassami taakkunani innuttaasut nalinginnaasut nunap iluani aatsitassarsiorluni misissuinissamat piiaanissamullu periarfissaqartinneqarput. Annikitsumik aatsitassarsiorinissamat akuersissutit, aatsitassarsiorluni ingerlatanut najukkami annikinnerusumik aallaaveqarlutik, innuttaasunit nunaqavissunit ingerlanneqartunut, nunani tamalaani ingerlatseqatigiiffittulli aningaasaateqanngitsunut aamma immikkut piginnaasaqartuunngitsunut, ilusilersugaapput.

Siunnersuuteqartup siunnersuummini ujartorpaa, innuttaasut nunaqavissut annikitsumik aatsitassarsiorluni ingerlataqarnissamat kisermaassinerullutik periarfissaqartinneqassasut. Nuannaarutigaaara siunnersuuteqartumut nalunaarutigisinnaagakku, Aatsitassanut ikummatissanullu inatsit annikitsumik aatsitassarsiorluni ingerlataqarnissamat innuttaasunut aalajangersimasumik najugaqartuusunut ullumikkut kisermaassiviusumik periarfissaqartitsereermat.

Ullumikkut inatsimmi piumasaqaataareerpoq, annikitsumik aatsitassarsiorinissamat akuersissutit, inunnut inuit allattorsimaffianni Kalaallit Nunaanni najugaqartuusunut aammalu tamakkiisumik akileraartussaataitaasunut, taamaallaat tunniunneqarsinnaasut. Tamatuma saniatigut inuit piffissami ataatsimoortumi minnerpaamik ukiut siuliini ukiuni tallimani piumasaqaatit taakku naammassisimassavaat.

Tamatuma saniatigut inuup piffissaq akuersissuteqarfiusoq tamaat inuit allattorsimaffianni najukkap nalunaarsorsimasuunissaannik piumasaqaat naammassisimasussaavaa aammalu Kalaallit Nunaanni tamakkiisumik akileraartussaataitaasussaalluni. Taamaalilluni Kalaallit Nunaat qimallugu nuukkaanni, annikitsumik aatsitassarsiorinissamat akuersissut pigiinnarneqarsinnaanngilaq.

Taamaalilluni innuttaasut aalajangersimasumik najugaqartut immikkut aammalu kisermaassiviusumik annikitsumik aatsitassarsiorluni ingerlataqarnissamat

periarfissaqareerput. Taamaalilluni siunnersuuteqartup tunngavilersuutai Aatsitassanut ikummatissanullu inatsimmi naammassineqareerput.

Aatsitassanut ikummatissanullu inatsimmi sukannersunik piumasqaateqartoqareerpoq. Kalaallimut nunani allani najugaqareerluni Kalaallit Nunaannut uteqqammersumut annikitsumik aatsitassarsiornissamut akuersissummik pissarsisinnaanissamik utaqqilluni, ukiut tallimat sivisoorujussuupput. Tassami ukiunik tallimanik maleruagassaqarnera aamma kalaallinut inuunermik annertunersaa Kalaallit Nunaanni najugaqarsimasunut, kisianni aamma ukiorpassuarni nunani allani najugaqarsimasunut, atuuppoq. Taakkua Kalaallit Nunaannut utereerneramik kingorna annikitsumik aatsitassarsiornissamut akuersissummik pissarsisinnaalernissaminnut ukiuni tallimani utaqqisariaqartarput.

Inuup Kalaallit Nunaannut atassuteqarnera aallaavigalugu naleqquttutut isigineqarpat, aammalu inuk ilinniarnermik, napparsimanermik assigisaannilluunniit pissuteqartumik Kalaallit Nunaata avataaniissimappat, ukiunik tallimanik maleruagassaqarnermik saneqqutsinissamik immikkut akuersissuteqartoqarsinnaavoq. Aatsitassanut ikummatissanullu inatsimmi taamaalilluni qulakkeerneqarpoq, inuit taamaattut annikitsumik aatsitassarsiornissamut akuersissummik pissarsinissartik annaasariaqanngikkaat.

Siunnersuuteqartup siunnersuutigaa innuttaasut nunap iluani pisuussutininik pissarsisinnaalernissaminnut, tamatumunnga taarsiullugu ukiuni qulini utaqqisassasut. Tamanna naleqqutinngitsoq Naalakkersuisut isumaqarput.

Annikitsumik aatsitassarsiornissamut akuersissutinut sukannersunik piumasqaateqartoqassasooq Naalakkersuisut isumaqatigaat. Kisianni peqatigisaanik innuttaasut ataasiakkaat eqqarsaatigineqarnissaat pingaaruteqarpoq. Annikitsumik aatsitassarsiornermut innuttaasut nalinginnaasut akornanni atituumik soqutiginnilersitsinissaq Naalakkersuisut sulissutigaa. Taamaattumik annikitsumik aatsitassarsiornissamut akuersissummik innuttaasut nalinginnaasut pissarsinissaat pisariaqanngitsumik pisariusariaqanngilaq. Innuttaasut nalinginnaasut ukiuni qulini utaqqeqquneqarnissaat naleqqutinngitsoq Naalakkersuisut isumaqarput. Tamatuma saniatigut kalaallit inatsisaanni ukiunit tallimanit siviunerusumik atassuteqarnissamut sukannernerusunik piumasqaateqartarneq ileqqorineqanngilaq.

Siunnersuuteqartup takutinniarsaraa maannakkut inatsisit malillugit pisuussutivut inunntut sivikitsuinnaap qaangiunnerani Kalaallit Nunaannit qimaguttussanut tunniunneqaannartartut. Tamanna pissusiviusunut naapertuutinngilaq. Paarlattuanik annikitsumik aatsitassarsiornissamut akuersissutinik suliaqartarnerup takutippaa, annikitsumik aatsitassarsiornissamik qinnuteqartut Kalaallit Nunaannut annertuumik atassuteqartuusartut. Qinnuteqaateqartartut siunissami qanittumi allannguuteqassasut Naalakkersuisut isumaqanngillat. Paarlattuanik Kalaallit Nunaannut sakkortuumik atassuteqartuusarlutik maannakkut pisartut ingerlaannassasut naatsorsuutigineqarpoq.

Taamaattumik maannakkorpiaq inatsisip allannguuteqartinneqarnissaanut tunngavissaqartoq Naalakkersuisut takusinnaanngilaat. Taamatut oqaaseqarlutik Naalakkersuisut siunnersuutip itigartinneqarnissaa inassutigaa.